

Herinneringe oet de kinjerjoare

De ingelbewaarder deij vreuger alle kinjer bewaake.
Hae hoelj ze in de gaate die ondeugende sjnaake.
Went ze aan de eppel, peere en proeme ginge die prieje.
En mit ee maedje in 't getske sjtinge te vrieje.
Die sjtiemukem deije rooke. En aaf en toe ins vlooke.
Mit kattedulte sjeete. En maedjes oetsjoelje vuur geete.
Es ze pielke deije mikke. En sigaarebendjes sjtikke.
Sjpieële mit eene dieke bal. Sjpieëlplaats houw me uueveral.
Mit de sjpringkoord sjpringe. Saame noa de sjpieëltuin ginge.
Aan 't putje dringke goan. Effe bie 't Mariabeeld sjtoan.
Mit 3 belkes prikke. En metske deije sjtikke.
Aan ee ieske lekke. Trommelle op ee blik mit 2 sjtekke.
Eene lolly loetsje. Van de roetsbaan roetsje.
Sjudde mit een flesj laakrits. Dae ze goelje dan bie 't Tits.
Achtereen bukske sjpringe. Taege de groendj aan ginge.
Versjtupperke sjpieële goan. Achter eene diekke boom sjtoan.
Een gans hoeëshouwe op eene fiets. Gelache vuuer een sjuinse wiets.
Lieëre loope op sjteltje. Voetballe op ee veldje.
Belke trikke en hel loope. Vuuer ee paar cent klumkes koope.
Huppelle in ee perk. Geen hoeëswerk.
Cattedichismus lieëre. Vuuer in gedurp die 3 Hieere.
Jieëderre daag noa de kirk goan. Oeere in de Vastepraedig sjtoan.
Sjpieële mit een lappe poep. In de zon vuuere op de sjtoep.

Mit pieël en boag gesjoate. Fietsbenj laeg geloate.
Bie 't koekkeralle. Kneij kepot gevalle.
Sjpieële mit eene diaabool. Voetballer makde een goal.
Mit een ringk loope. Mam deij de kinjer roope.
Jieëdereen ging uueversjtage. Bloome plukke vuuer Moederdag.



Vuuer ze noa de sjoeël ginge.
In de Meijgraaf baekske sjpringe.
Schjaatse goan in Frins weij.
Kuukellebeuk sjloan op de heij.
Loope op 2 greunte busse.
In de buerd ee brendje blusse.
Doeër vergroetglaas aangegange.
Houwe lang gesjtange.
Eene windjvooëgel loate sjtoan.
Op de Hiering warbelle plukke goan.
Aan 't bergsputje waater hoale.
Op klomde mit hooetezoale.
Achter de Breuk sallemanders vange.
Kikkerdril aan ee gehange.
In de buusj hutte boewe.
Haevesj goan went de oavendklok ging loewe.
Ich huuer noe op 't blaad is vol.
Mit wieëneg welvaart gans veuel lol.